

BON DIA

Aruba

Frase di Dia

"Soldá cu bai guerra sin capa, di morto sigur lo no scapa"

Dr. Oswald Wever

Diasabra, 09 di April, 1994

80 CENT

Aña 3 / No.892

Otro sla formal pa turismo

HILTON CONCORDE HOTEL TA SER BENDI NA VINDISHI

ORANJESTAD

Un noticia impactante y masha sensitivo mes, ta e venta na vindishi di Hilton Concorde Aruba. Esaki ta tuma lugar riba peticion di Banesco International di Puerto Rico, na kende Aruba Hotel Interprises, doño di e hotel, debe e suma di 19 miyon dollar.

Fuera di e debe aki, tambe tin un suma di 26 miyon dollar na e compania Growth Development y tambe tin un otro suma di 6 miyon tambe serca Banesco International.

Pues nos ta papia di un suma di 51 miyon florin y Banesco no kier spera mas riba pago di e debe aki y a bai over na venta di e hotel, cu for di algun tempo caba ta den problemanan serio. Riba pagina 3 tin un relato mas extenso riba e hotel aki, cu ta bai bira otro situacion su sigur no ta nada bon pa henter e desarroyo turistico di nos isla.

E desarroyo turistico ta hañando sla formal uno tras di otro y si no bini cambio den e situacion aki, nos ta teme pa futuro di e industria aki, cu ta e fuente principal di entrada cu a keda despues di cierre di Lago.



ANA GABRIEL DEN CONCIERTO-ORANJESTAD- E popular cantante Mexicano, Ana Gabriel lo ta den Concierto aki na Aruba, Diabierna 6 di Mei pa 8'or di anochi den Aruba Entertainment Center. Presentacion di e gran artista aki, a bira posibel dor di Melody Promotions cu cooperacion di Costa Linda Beach Resort, American Airlines, Dos Equis, y tambe di Indel y J/M Car Rental.

Aruba Jazz '94



ORANJESTAD- Tur cos ta cla pa otro Aruba Jazz & Latin Music Festival, cu lo start sali dia 17 di Juni y lo cubri dos fin di siman. Apesar cu e programa ta conta cu artistanan sólido, toche festival di e aña aki no ta bai tin e mesun peso artistico cu e añanan anterior. E artista grandi cu sin duda y cu lo bai percurá pa un yeno completo, lo ta Carlos Vives, kende lo sera e festival dia 26 di Juni.